

Di Leta weh di Apasl Paul Rait tu PHILEMON

Weh dis buk deh taak bout

Philemon dah wehn wan biliiva weh wende hai op iina sosaiyaty. Ihn wehn sopuoz fi bii wan memba a di chorch dah Colossae. Wel, Philemon wehn gat wan sliev weh wehn niem Onesimos. Ahn dis sliev wehn ron weh fahn Philemon, ahn somhow ihn get fi miit'op wid di Apasl Paul weh wende iina jiel iina daty taim. Den, iina God gries, Onesimos wehn ton wan biliiva iina Jesus Christ chruu Paul!

Dis leta weh Paul rait dah wehn fi inkorij Philemon fi tek bak Onesimos weh Paul wende sen bak tu im. Paul wende aks Philemon fi paadn Onesimos, ahn welkom im bak laik wan bredda iina di Laad.

How dis leta set op

Introdokshan1-3

Paul priez'op Philemon4-7

Paul inkorij fi mek Philemon tek bak Onesimos8-22

Paul laas wod dem iina dis leta23-25

Di Apasl Paul rait wan leta tu ihn fren Philemon

¹Dis leta dah fahn mii, Paul, weh deh iina prizn sieka Christ Jesus, ahn fahn wi bredda Timothy. ²Wi deh rait tu yu, Philemon, weh work wid wi ahn weh dah wi dier fren; ahn tu wi sista, Apphia, ahn tu wi bredda, Archippus, weh deh work wid wi tu, laik wan suoldya. Ahn wi deh rait tu aal di biliiva dem fahn di chorch weh miit dah yo hous.

³Wi deh prie fi wi Faada God —lang wid di Laad Jesus Christ— gi unu plenty gries ahn piis iina unu haat!

Philemon gat plenty lov ahn fiet

⁴Philemon, wen Ah memba yu iina mi praya dem, Ah tank mi God aal di taim, ⁵bikaaz Ah hier bout yo fiet iina di Laad Jesus, ahn yo lov fi aala God

pipl dem. ⁶So, Ah prie seh di fiet weh yu gat iina di Laad Jesus gwain help ada pipl fi andastan muo beta bout aal di blesin dem weh God gi wi, wen wi dah wan wid Christ. ⁷Mi dier breda, di lov weh yu gat ongl mek mi hany, ahn ih inkorij mi plenty. Ahn ih mek aala God pipl dem hany iina dehn haat tu.

Paul pliid wid Philemon fi paadn ihn sliev, Onesimos

⁸So den, dat dah wai Ah gat di korij fi aks yu wan fieva. Ah kuda aada yo fi du di rait ting iina di niem a Christ, ⁹bot sieka di lov weh wi gat, Ah wuda reda aks yu insida dat: Mii, Paul, weh dah now wan uol man iina prizn fi Christ, ¹⁰deh beg yo fi help out Onesimos.^a Ah luk pan im laik mi uon son, bikaaz dah rait yah iina prizn ihn get fi nuo Jesus Christ chruu mii. ¹¹Ah nuo seh fahn lang taim him neva gud tu yu, bot now ihn yuusful tu yu ahn tu mii tu.

¹²So den, now Ah deh sen im bak tu yu. Ih no iizy fi mi, bikaaz Ah lov im wid mi huol haat. ¹³Ah wehn waahn kiip im rait yah wid mi, wail Ah deh iina prizn fi priich di Gud Nyuuz, so ihn kuda wehn help mi iina fi yo plies. ¹⁴Bot, Ah neva waahn du notn bifuor yu tel mi fos weh fi du. So, Ah wehn waahn yuu shuo yo kainis, bikaaz yuu waahn, ahn no bikaaz nonbady deh fuos yo fi du'ih.

¹⁵Mieby dat dah wai Onesimos wehn get tek weh fahn yu iina di fos plies, so now ihn kyan deh wid yuu fi gud! ¹⁶Bot now, Onesimos dah no muo jos wan sliev; ihn ton wan riil breda, speshaly tu mii! Ahn now ihn gwain miin moch muo tu yuu tu, no ongl laik wan sliev, bot laik wan Kristyan breda tu!

¹⁷So, if yu tink a mii laik wan paadna wid yu, den welkom Onesimos jos laik how yu wuda welkom mii. ¹⁸Ahn, if ihn wehn eva du enyting bad tu yo, or if ihn huo yu enyting, yu fi put'ih pahn mi akount. ¹⁹Dah mii, Paul, deh rait dis wid mi uon han: *Ai wi pie yo bak*. Ah no tink Ah hafy menshan seh yuu huo mii yo uon laif. ²⁰So, mi breda, jos du mi dis fieva fi di Laad siek; ahn mek mi haat hany. ²¹Ah shuor seh, az Ah deh rait yo, yu gwain du weh Ah aks yo fi du, ahn iivn muo an weh Ai deh aks.

²²Wan muo ting: pliiz get wan ruum redy fi mi, bikaaz Ah deh huop seh God gwain ansa aala unu praya dem, ahn Ah gwain kyan kom bak tu unu suun-suun.

Di laas griitin dem

²³Epaphras, weh deh iina prizn wid mi sieka Jesus Christ, sen heluo fi yu, ²⁴ahn Mark, ahn Aristarchus, ahn Demas, ahn Luke —weh dah mi fela worka dem— sen heluo tu.

²⁵Ah prie seh di gries a di Laad Jesus Christ deh wid aala unu. Amen!

^a ¹⁰ Nuotis seh: di niem Onesimos miin “yuusful.”